



## **DECLARACIÓN INSTITUCIONAL POLO 25 DE NOVEMBRO DÍA INTERNACIONAL POLA ELIMINACIÓN DA VIOLENCIA CONTRA AS MULLERES**

---

No próximo mes conmemoraremos unha outra vez o 25 de novembro como Día Internacional pola Eliminación da Violencia contra as Mulleres, nun ano 2023 onde observamos con preocupación o recrudecemento dalgúns tipos de violencias contra as mulleres e en que vivimos a expansión dunha vaga reaccionaria que nega a violencia machista e pon en cuestión a necesidade de que as administracións traballen a prol da igualdade.

Mentres uns negan a violencia machista, a realidade da desigualdade, discriminación e violencia contra as mulleres indica que segue sendo necesario centrar os nosos esforzos na prevención e actuación fronte ás violencias machistas. Segundo datos do XV informe anual do Observatorio Estatal da violencia sobre as mulleres 2021, o 86,2% de delitos contra a liberdade e indemnidade sexual cometéronse contra mulleres. Das 14608 vitimizacións de mulleres por este tipo de delitos, rexistráronse 287 de corrupción de menores ou persoas con discapacidade e 432 relacionados con contactos tecnolóxicos con menores de 16 anos.

Fronte a esta realidade, precisamos dotarnos de máis ferramentas para a prevención e actuación. É xa unha reclamación histórica por parte da cidadanía compostelá e dos colectivos feministas do concello a necesidade de reforzar os servizos de atención e acompañamento ás mulleres, especialmente ás mulleres vítimas de violencias machistas. O Centro de Información ás Mulleres do noso concello, formado por un equipo de grandes profesionais, ofrece un servizo esencial do que se benefician moitas mulleres, aínda cando conta con limitados recursos persoais.

Precisamente no ámbito local, observamos tamén con atención os datos que nos chegan por parte de entidades, colectivos e forzas de seguridade. Vimos de coñecer na pasada semana uns datos sobre os delitos sexuais no noso concello que nos preocupan, o do incremento dun 47,6% entre xaneiro e xuño.

Os datos de violencia sexual, o negacionismo da violencia machista que se estende entre a sociedade e o recrudecemento das agresións que sofren as mulleres, moitas moi novas e en ocasións perpetradas por menores, preocúpanos e ilustra que o traballo na prevención destas violencias debe comprender todos os espazos e chegar a todas as persoas. Non podemos tolerar condutas machistas na sociedade que fomentan valores que perpetúan a desigualdade e a violencia, nin podemos amparar política ou socialmente a quen o fai. No pasado mes de agosto vivimos a retransmisión en *prime time* da agresión que aconteceu durante a final da Copa Mundial Feminina de Fútbol, e como, malia os avances que temos feito colectivamente ao longo dos últimos anos, houbo moitas reticencias para identificar o agresor como o que é e solidarizarse coa vítima.

Desde a área de Igualdade do Concello vense traballando desde hai tempo na elaboración dun Protocolo para a Abordaxe das Violencias Sexuais e LGTBIfóbicas en Espazos de Ocio Nocturno, en colaboración con distintos axentes representativos da sociedade, coma o sector da hostalería, forzas e corpos de seguridade, asociacións en representación das mulleres e do colectivo LGTBI; representantes de colexios profesionais, do ámbito xudicial, da oficina da Valedora do Pobo e da corporación municipal. Este protocolo é un chanzo máis para fomentar a seguridade das mulleres no ámbito do ocio nocturno, pero debemos centrar máis esforzos na prevención das condutas machistas que proliferan entre a nosa sociedade.

Por todo o exposto, a Corporación municipal do Concello de Santiago, condena todas as formas de violencia machista e comprométese a traballar na súa eliminación de todos os espazos do noso concello, e para conseguilo, acorda:

- Apoiar as accións e manifestacións do movemento feminista compostelán e galego neste 25 de novembro.

- Reiterar o compromiso do Concello de Santiago co Pacto de Estado contra a Violencia de Xénero entendendo o noso papel de administración local como o primeiro punto de acceso, apoio e asesoramento para as mulleres vítimas de violencia machista e as súas familias.

-Incorporar a perspectiva de xénero e a protección das vítimas da violencia machista a todos os niveis de acción deste concello, impulsando a formación do persoal desta administración para garantir a non discriminación e o apoio e protección a todas as vítimas que accedan a recursos e servizos municipais.

-Coordinar o traballo preventivo e de intervención fronte a violencia machista que desenvolve o Concello de Santiago con outras administracións, nomeadamente cos servizos que presta a Xunta de Galiza e as forzas de seguridade.

-Solicitalle á Xunta de Galiza aumentar as prazas nas casas de acollida e aumentar o número para que poidan utilizalas máis mulleres con casuísticas nas que converxen múltiples vulnerabilidades que aumentan o nivel de risco.

-Impulsar as medidas oportunas para contribuír a garantir que os espazos municipais, como equipamentos deportivos, socioculturais ou educativos, son espazos seguros para as mulleres, que promoven os valores de igualdade e identifiquen as condutas que fomenten o machismo e/ou promovan a violencia contra as mulleres.

Santiago de Compostela, 26 de outubro de 2023

*Miriam Louzao Fernández*

**Portavoz do grupo municipal de BNG**

*María Rozas Pérez*

**Portavoz do grupo municipal de CA**

*Gonzalo Muíños Sánchez*

**Portavoz do grupo municipal de PSdG**

*Borja Vereas Fraiz*

**Portavoz do grupo municipal do PP**

**P  
o  
r  
t  
a  
v  
o  
z**